

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA E AS UNIVERSIDADES DE SANTIAGO DE COMPOSTELA, A CORUÑA E VIGO PARA O IMPULSO EFICIENTE DAS ESTRUTURAS DE INVESTIGACIÓN.

Santiago de Compostela, 19 de setembro de 2016.

COMPARECEN

D. _____, conselleiro de Cultura, Educación e Ordenación Universitaria (en diante CONSELLERÍA), nomeado mediante o Decreto 15/2015, do 9 de febreiro (DOG núm. 27, do 10 de febreiro), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

D. _____, reitor magnífico da Universidade da Coruña (en diante UDC), en representación desta, en virtude das facultades que lle confire o artigo 20.1 da Lei orgánica 6/2001, do 21 de decembro, de universidades.

D. _____, reitor magnífico da Universidade de Santiago de Compostela (en diante USC), en representación desta, en virtude das facultades que lle confire o artigo 20.1 da Lei orgánica 6/2001, do 21 de decembro, de universidades.

D. _____, reitor magnífico da Universidade de Vigo (en diante UVIGO), en representación desta, en virtude das facultades que lle confire o artigo 20.1 da Lei orgánica 6/2001, do 21 de decembro, de universidades.

Interveñen en función dos seus respectivos cargos e no exercicio das facultades que teñen conferidas e

EXPOÑEN

PRIMEIRO.- As universidades que integran o Sistema universitario de Galicia (en diante SUG) son entidades de dereito público que, xunto coa misión docente, realizan actividades de investigación e desenvolvemento científico e tecnolóxico o

que as configuran como un dos principais axentes xeradores de coñecemento en Galicia.

Un feito relevante é que en Galicia a universidade pública é o lugar onde máis se investiga. O impulso da actividade investigadora é un obxectivo irrenunciábel para calquera sociedade e por iso é necesario fomentar unha maior integración entre os centros de investigación e os sectores produtivos, incidir na cultura da calidade e eficacia na utilización das infraestruturas e do capital humano que permitan unha mellora significativa na totalidade dos sectores produtivos e, a súa vez, a potenciación dunha universidade galega de calidade.

SEGUNDO.- A Secretaría Xeral de Universidades é o órgano superior da Administración xeral da Comunidade Autónoma de Galicia para a ordenación, planificación e execución das competencias en materia de universidades e ensinanza universitarias correspondentes á consellería de Cultura, Educación e Ordenación Universitaria (en diante CONSELLERÍA) en relación coas atribuídas polo artigo 31 do Estatuto de autonomía de Galicia. A Secretaría Xeral de Universidades, de acordo coas competencias que lle outorgou o Decreto 4/2013, do 10 de xaneiro, de estrutura orgánica da CONSELLERÍA, debe velar pola promoción e xestión eficiente e integrada dos recursos e capacidades de investigación do Sistema universitario de Galicia (en adiante, SUG) para a súa vertebración e posta en valor no marco do sistema de innovación. Tal xestión concrétese na promoción, deseño e materialización dos instrumentos necesarios para mellorar o financiamento estrutural da actividade investigadora do SUG.

TERCEIRO.- O sistema público de I+D en Galicia, en particular no ámbito universitario, amosa unha marcada fragmentación, o que se traduce na existencia múltiples estruturas de investigación.

Nos anos 90, empezan a xurdir estruturas propias de investigación diferenciadas dos departamentos. A Lei orgánica 6/2001, do 21 de decembro, de universidades, outórgalles a libre creación e organización das mesmas independentes dos departamentos e dos institutos universitarios de investigación. Esta posibilidade é tamén recollida e desenvolvida na práctica totalidade dos estatutos universitarios promulgados ao amparo da citada lei.

En materia de estruturas de investigación, cada unha das tres universidades do SUG seguiu as súas propias políticas, establecendo de acordo coas súas necesidades e orientacións estruturas específicas que actuaran como soporte da investigación e da docencia. Conformáronse así, unidades de investigación superiores ao grupo de investigación tales como institutos, centros singulares, centros de investigación, centros tecnolóxicos, consorcios, agrupacións estratéxicas e fundacións.

A dita situación da lugar á existencia, dentro do SUG, de capacidades e servizos infrautilizados ao tempo que se detecta a falta doutros que poderían ser de interese para as políticas de investigación das universidades galegas.

Por outra banda, a limitada coordinación destas políticas en materia de infraestruturas e servizos, dá lugar a un uso non plenamente eficiente das capacidades, en ocasións polo descoñecemento dos potenciais usuarios; pero, tamén pola carencia dunha estratexia de orientación ás necesidades demandadas.

Nun momento como o actual, nunha sociedade globalizada, cunha crecente interdependencia económica exterior e nun contexto de cooperación e competición global polo talento e por investimentos relacionados co coñecemento, é necesario apostar por iniciativas que permitan acadar proxectos singulares, de cara a mellorar a capacidade de competencia. É preciso afrontar un conxunto de medidas e accións concretas a desenvolver por actores específicos para intensificar a actividade investigadora e aumentar a produtividade científica mediante a diversificación na chegada de recursos.

Os aspectos relacionados coa organización da investigación están cobrando especial importancia, tanto polos cambios acaecidos nos modos de produción do coñecemento científico como polas crecentes esixencias de eficacia e eficiencia nos procesos de investigación, abarcando aspectos de política científica, de persoal, de infraestruturas, de equipamentos e de servizos de apoio á investigación.

Faise necesario, polo tanto, establecer criterios para ordenar e consolidar os recursos e actividade investigadora das universidades para:

- Asegurar a estabilidade deste tipo de estruturas
- Optimizar a utilización de recursos
- Evitar a duplicidade de infraestruturas.

CUARTO.- Que H2020 é a estratexia de especialización da Unión Europea para facer fronte á crise e acadar unha economía intelixente, sustentable e integradora que goce de altos niveis de emprego, de produtividade e de cohesión social. Nesta estratexia destácase o papel fundamental da investigación e da innovación na preparación da Unión Europea ante os desafíos futuros e sinala cinco ambiciosos obxectivos en materia de emprego, innovación, educación, integración social e clima/enerxía.

A estratexia Europa 2020 considera que o apoio á investigación e á innovación terá que desenvolverse ao redor da excelencia científica, as industrias competitivas e unha mellor sociedade, centrando o investimento nos principais problemas comúns de todos os europeos, como o cambio climático e a competitividade da enerxía renovable ou os desafíos dunha poboación cada vez máis envellecida.

Non se debe esquecer que no Marco estratéxico común 2014-2020 a Comisión Europea considera a innovación como un dos obxectivos temáticos aos que se destinarán os fondos comunitarios nese período. O investimento público orientarase ao que se denomina “concentración temática”, cunha política aplicada a prioridades moi concretas que favorezan o crecemento, a adecuación dos fondos ás propostas das

rexións onde se apliquen, seguindo unha estratexia de gasto baseada nas súas propias necesidades e retos do seu desenvolvemento.

QUINTO.- Estímase que as actuacións previstas no presente convenio son coherentes co Plan estratéxico de Galicia 2015-2020, correspondéndose co seu Eixo E1 (“Empregabilidade e crecemento intelixente”), Prioridade de actuación PA01 (“Impulso de consolidación das políticas de gasto vencelladas ao I+D+i”), no obxectivo estratéxico OE02 (“Mellorar a capacidade investigadora e os resultados da investigación universitaria galega”).

SEXTO.- Que, a partir da situación actual, a CONSELLERÍA, a UDC, a USC e a UVIGO consideran necesario impulsar a ordenación, estruturación e potenciación das estruturas de investigación.

Por conseguinte, as partes abaixo asinantes acordan subscribir o presente convenio, que se rexerá polas seguintes

CLÁUSULAS

PRIMEIRA.- Obxecto do convenio

O obxecto deste convenio é establecer as condicións polas que se rexerá a colaboración entre a CONSELLERÍA e a UDC, a USC e a UVIGO para a ordenación, estruturación e potenciación eficiente de estruturas de investigación.

SEGUNDA.- Actuacións

As actuacións realizadas ao amparo do presente convenio enmarcaranse en tres accións principais:

1.- Elaboración do mapa das estruturas científico-tecnolóxicas e da oferta de servizos asociados.

1.1º.- Coa finalidade de avaliar a situación real, abordarase:

- A realización do mapa de distribución das infraestruturas e equipamentos de investigación e da oferta de servizos das tres universidades.
- A análise dos datos da rede de infraestruturas e equipamento científico-técnico das tres universidades galegas para detectar as fortalezas e debilidades, o seu grao de utilización, a vixencia ou depreciación das infraestruturas dispoñibles, a súa singularidade, a súa viabilidade e a súa posible complementariedade /accesibilidade (modelos organizativos) con outros servizos do SUG.

1.2º.- Os datos recollidos para elaborar o mapa permitirán :

- Identificar as estruturas de investigación das tres universidades e as necesidades reais.
- Coñecer os criterios de ordenación e priorización da investigación no SUG.
- Diseñar e planificar un modelo de organización e funcionamento común que optimice os recursos actuais.
- Identificar e servizos de apoio a investigación que require o SUG

2.- Identificación de novas agrupacións estratexias.

Coa finalidade de fixar un marco estratéxico ou de accións específicas que identifique os eixes prioritarios no ámbito da investigación sobre os que incidir no período 2016-2020, no marco do vixente Plan galego de financiamento universitario (aprobado polo Acordo do Consello da Xunta de Galicia do 29 de outubro de 2015, DOG número 221, do 19 de novembro).

3.- Plan de reforzo de liderado científico.

Coa finalidade de promover o liderado científico en áreas estratéxicas para Galicia establece este plan para :

- Identificar e aproveitar as fortalezas do sistema público de I+D en Galicia.
- Detectar ámbitos de investigación con un elevado potencial de aplicación en sectores e tecnoloxías claves para nosa economía.
- Fomentar a xeración de novas oportunidades e incrementar o liderado científico do país naqueles ámbitos de excelencia a nivel internacional en posición de contribuír a xeración de coñecemento de fronteira
- Continuar o proceso que fomenta a xeración de coñecemento en torno a necesaria especialización científico-tecnolóxica e a agregación de capacidades.

TERCEIRA.- Financiamento

A dotación para este convenio é de cincocentos corenta mil euros (540.000,00 €), con cargo ao orzamento da Xunta de Galicia para o ano 2016, no marco do Plan galego de financiamento universitario 2016-2020 (aprobado polo Acordo do Consello da Xunta de Galicia do 29 de outubro de 2015, DOG número 221, do 19 de novembro), aplicación orzamentaria 10.40.561B.744.0 (2016 00129), co seguinte reparto e conforme á táboa resumo que se incorpora:

ANO 2016	UDC	UCD	UVIGO	TOTAL
IMPORTE	180.000,00€	180.000,00€	180.000,00€	540.000,00€

Esta cantidade de 540.000,00 € trátase dun importe certo e queda por conta da UDC, da USC e da UVIGO a diferenza de financiamento necesario para a total execución da actividade subvencionada, debendo ser reintegrado o financiamento público no caso e polo importe que supere o custo total e real da actividade, segundo o establecido no artigo 21.2 do regulamento da Lei 9/2007, do 13 de xullo, de subvencións de Galicia, aprobado polo Decreto 11/2009, do 8 de xaneiro

A axuda é compatible con outras concedidas para o mesmo fin; pero, en ningún caso, o importe da subvención achegada pola consellería poderá ser de tal contía que, illada ou en concorrencia con outras subvencións, supere o custo da actividade subvencionada, tal como se establece no artigo 17.3 da Lei 9/2007, do 13 de xuño, de subvencións de Galicia.

De conformidade co artigo 31.7 da Lei 9/2007, do 13 de xuño, de subvencións de Galicia, e de conformidade co establecido no artigo 11.e) do Decreto 11/2009, do 8 de xaneiro, polo que se aproba o regulamento da Lei 9/2007, de subvencións de Galicia, a obriga de presentar a certificación do cumprimento de obrigas coa Administración pública da comunidade autónoma, coa Administración do Estado e coa Seguridade Social substituirase por unha declaración responsable de estar ao día no cumprimento das obrigas tributarias ou fronte á seguridade social e de non ter pendente de pagamento ningunha outra débeda coa Administración.

Anexo: TÁBOA RESUMO DO CONVENIO PARA O IMPULSO EFICIENTE DAS INFRAESTRUTURAS DE INVESTIGACIÓN			
SUG	ACCIÓNS	ACTUACIÓNS	IMPORTE
UVIGO	Mapa de infraestruturas e servizos	Elaboración mapa-inventario de infraestruturas e servizos científico-técnico centralizados: persoal de apoio	30.000,00
		Elaboración mapa-inventario de infraestruturas e servizos científico-técnico centralizados: software, bases de datos, imaxe	20.000,00
	Identificación novas agrupacións	Posta en marcha clusters ámbito xurídico e humanístico	20.000,00
		Análise de capacidades, elaboración de plans estratéxicos e/ou de accións específicas	10.000,00
	Reforzo liderado científico	Participación en redes, clusters e plataformas nacionais e internacionais.	15.000,00
		Apoio a proxectos estratéxicos	45.000,00
		Organización de eventos/networking, congresos científicos	40.000,00
	TOTAL IMPORTE ACTUACIÓNS UVIGO		

UDC	Mapa de infraestruturas e servizos	Elaboración informes técnicos situación e capacidade para CICA, CITEEC, CIT, CITIC, ESCI-SAI, OTRI	36.000,00
		Elaboración informes técnicos situación e capacidade conxunta UDC e plataforma de xestión	14.000,00
	Identificación novas agrupacións	Elaboración informe técnico agrupación estratéxica CITEEC	13.000,00
		Elaboración informe agrupación estratéxica CIT	17.000,00
	Reforzo liderado científico	Mellora páxina web e posicionamento buscadores centros tecnolóxicos e OTRI, vídeos promocionais centros tecnolóxicos e OTRI, preparación de folletos e outras accións de difusión de investigación, análise e mellora das estruturas de investigación, pago de cotas estruturas de investigación, análise de escaparates tecnolóxicos, formación lexislación patentes, definición procedemento patentabilidade, revisión/asesoramento de patentes, definición estratéxica de transferencia tecnolóxica, creación de bases de datos convocatorias e consultoría de proxectos internacionais, consultoría licitacións da U.E.	100.000,00
	TOTAL IMPORTE ACTUACIÓNS UDC		180.000,00
USC	Mapa de infraestruturas e servizos	Análise de actividade e deseño de plan de acción en institutos e agrupacións	35.000,00
		Persoal técnico de apoio	15.000,00
	Identificación novas agrupacións	Análise e avaliación de capacidades. Deseño de estratexias de colaboración e agrupación	30.000,00
	Reforzo liderado científico	Plan de acción para a promoción da I+D en Matemáticas	30.000,00
		Plan estratéxico do Campus da Cidadanía	40.000,00
		Accións de extensión universitaria e internalización	15.000,00
		Implantación do Selo Europeo HRS4R de Xestión de Investigadores	15.000,00
	TOTAL IMPORTE ACTUACIÓNS USC		180.000,00

CUARTA.- Fórmula de pagamento

Para o pagamento único, cada universidade achegará antes do 20 de decembro de 2016:

- Unha certificación expedida polo órgano de control que corresponda na que se acredite a toma de razón en contabilidade, que se cumpriu a finalidade do presente convenio e que os fondos foron destinados a este fin, así como o detalle da realización dos gastos e dos pagamentos.
- Unha memoria explicativa das actividades desenvolvidas con cargo aos fondos recibidos que, como mínimo, deberá manifestar detalladamente as actuacións realizadas, os conceptos, procedementos de contratación, períodos de realización e pagamento dos gastos presentado. Coa memoria achegárase copia cotexada da xustificación dos gastos (facturas ou documentos contables de valor probatorio equivalente, contratos, actas, ...) e dos pagamentos, cos xustificantes das transferencias bancarias ou documentos acreditativos dos pagamentos realizados.
- Unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para este fin, das distintas administracións públicas.
- Así mesmo, deberase presentar unha declaración responsable de estar ao día no cumprimento das obrigas tributarias ou fronte á seguridade social e de non ter pendente de pagamento ningunha outra débeda coa Administración.

QUINTA.- Responsabilidade

A subscrición do presente convenio non supón relación laboral contractual ou de calquera outro tipo entre os/as profesionais que vaian a desenvolver as actividades e a CONSELLERÍA, de tal xeito que non se lle pode esixir responsabilidade ningunha, indirecta nin subsidiaria, polos actos ou feitos acontecidos no seu desenvolvemento.

SEXTA.- Comisión de seguimento

Para o seguimento do convenio ou coñecemento de calquera cuestión sobre a súa interpretación, modificación, resolución ou efectos deste que poidan xurdir, créase unha comisión mixta constituída do seguinte modo:

- tres membros da Secretaría Xeral de Universidades, dos que un/unha actuará como presidente/a.
- un membro por cada unha das tres universidades.

A dita comisión actuará como órgano de vixilancia, seguimento e control do establecido neste convenio, promovendo, se o considera conveniente, outras actuacións que poidan enriquecer o seu desenvolvemento.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida serán resoltas pola CONSELLERÍA.

SÉTIMA.- Vixencia do convenio

O presente convenio entrará en vigor na data da súa sinatura, sen prexuízo de que poida atender accións realizadas desde o 1 de xaneiro de 2016, e terá vixencia ata o 31 de decembro do 2016.

Non obstante o establecido no apartado anterior, este convenio poderá extinguirse por acordo mutuo e voluntario das partes, por renuncia dalgunha ou por denuncia deste por incumprimento dalgunha delas, o que se comunicará fidedignamente, logo de audiencia desta e con, polo menos, un mes de antelación. En calquera destes casos procederase á revogación da axuda, así coma ao reintegro total ou parcial das cantidades percibidas e a esixencia de xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.

OITAVA.- Natureza do convenio

De acordo co establecido no artigo 36 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, este convenio ten un interese público, xa que de conformidade co previsto nos artigos 53 e 54 da Lei 6/2013, do 13 de xuño, do Sistema universitario de Galicia (DOG núm. 125, do 3 de xullo) corresponde á Xunta de Galicia, a través da CONSELLERÍA, coordinar as universidades do SUG para acadar a mellora da docencia, a investigación, a extensión universitaria, a promoción, a adaptación ás demandas e necesidades da sociedade e a realización de estudos no ámbito da docencia, investigación, innovación, xestión, ...

As actuación previstas no convenio esténdense ás tres universidades galegas, potenciando a racionalización do mapa universitario, podendo beneficiarse todos os grupos de investigación e agrupacións estratéxicas do SUG. Polo tanto, non é necesario promover a concorrência competitiva.

O presente convenio de colaboración ten a natureza dos previstos no artigo 4.1c) do Real decreto lexislativo 3/2011, do 14 de novembro, polo que se aproba o texto refundido da Lei de contratos do sector público, e se realiza ao abeiro do establecido no artigo 6.1 da Lei 30/1992, do 26 de novembro, de réxime xurídico das administracións públicas e do procedemento administrativo común, e réxese para os seus efectos polo establecido nas cláusulas deste, e no seu defecto pola normativa xeral en materia de contratos das administracións públicas e polo establecido na Lei 9/2007, do 13 de xuño, de subvencións de Galicia e o seu regulamento, aprobado polo Decreto 11/2009, do 8 de xaneiro.

De acordo co disposto na comunicación da comisión sobre o Marco de axudas estatais de investigación e desenvolvemento e innovación (2014/C 198/01), publicado no Diario Oficial da Unión Europea do 27 de xuño de 2014, a subvención

contemplada neste convenio non constitúe axuda de Estado nos termos do artigo 107 do Tratado de funcionamento da Unión Europea ao tratarse de financiamento público de actividades non económicas como instrumento axeitado para dar resposta a obxectivos e fins de interese común, en particular, a coordinación e cooperación como elemento relacional básico para a racionalización do mapa universitario e o fortalecemento do conxunto das universidades galegas respectando a identidade de cada unha delas (artigo 2, 1,c da Lei 6/2013, do 13 de xuño, do Sistema universitario de Galicia).

Non obstante a UDC, a USC e a UVIGO deberán garantir que as actividades derivadas deste convenio axústanse ás normas procedimentais e materiais vixentes no momento da concesión da axuda, debendo de informar á CONSELLERÍA por medio da comisión de seguimento.

NOVENA.- Publicidade

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a UDC, a USC e a UVIGO consenten expresamente para que a Administración inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas. A reserva que puideran facer as beneficiarias no sentido de non autorizar a obtención dos datos ou a publicidade destes nos rexistros, que en todo caso terán que expresarse, poderá dar lugar á exclusión do proceso de participación para obter a axuda ou á revogación do acto de outorgamento.

As subvencións estarán sometidas á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

En aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, de acordo co indicado na actual redacción do artigo 20 da Lei 38/2003, de 17 de novembro, xeral de subvencións e segundo o disposto nos artigos 3.1, b) e 15 da Lei 1/2016, do 18 de xaneiro, de transparencia e bo goberno, a información correspondente ao presente convenio publicárase na Base de Datos Nacional de Subvencións.

DÉCIMA.- Resolución de controversias

O presente convenio réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen no artigo 8.3 da Lei

30/1992, do 26 de novembro, de réxime xurídico das administracións públicas e do procedemento administrativo común.

Lido por todas as partes, por si mesmas, e como proba de conformidade co expresado no presente convenio, asínano e rubrícano por quintuplicado, no mesmo lugar e data que se indica ao comezo.

O conselleiro de Cultura, Educación e
Ordenación Universitaria

O reitor da Universidade da Coruña

O reitor da Universidade de Santiago de
Compostela

O reitor da Universidade de Vigo